

SAN JUAN KARTA NYAFXTEWE'SX

Ītxi kaafxi'ze'jwa'jsa vxyaani

¹ Nyafxiiitey ūsyā'kh yu' txā'sna kaajiyu'jna fxi'jaçthu i'kwe'sxtxi. Kwe'sxa' iiwēse'tha'w sa' kwe'sx yafxju yuu iuytha'w. Ī'neeçxáa uymée, kwe'sx kusejuwa iijxa'dxtha'w Dxus Nçxi'k ĩtxi kaafxi'ze'jwa'jsa's.

² Itxi kaafxi'ze'jwa'jsa' vxyaak, aça' uyçxa' txāa vxyaani's kwe'sxa' pta'sxi'tha'w. Txāasatha'w āçxha' i'kwe'sxtxiwa kaajiyu'ju', bagaçxte yuhwa pçumée ĩtxi kaafxi'ze'jwa'jsa Ney yakh ūssa kwe'sxtxi vxyaapa'ga.

³ Kwe'sx wēse'jçxa yafxjuwa uyni's āate pta'sxiçtha'w, i'kwe'sxwa kwe'sx yakh utxaaçxa fxi'zekahn, kwe'sxwa ma'wētk'a'w Dxus kwe'sx Tata yakh vxite' Nçxi'k Jesukristo yakh utxaaçxa fxi'ze' txā'wēy.

⁴ Txā'wētha'w kaajiyu'jna fxi'ja', i'kwe'sxwa weçxana fxi'zewaja's ji'phukah.

Dxusa' eena'sa'

⁵ Jesukristo na'wēk kaapiya'j txā'sna i'kwe'sxtxi pta'sxiçtha'w: Dxusa' eena'sa'. Txāa pa'ga txajx tasxte' kīh yuhwa çxhi'dxsa meea' jī'k.

⁶ Aça' maawa Dxus yakh fxi'zena ūsthu jīçxawa, Dxus jxkaahni's nwēese'jmée çxhi'dxte fxi'zeçxa', ĩsxiisa yuuna.

7 Nawa Dxuswa ma'wě eena'te ũsna txã'wěy kwe'sxwa eena'te fxi'zete', kwe'sx pwe'sx putx puiimée zhiçkwe fxi'zewa'j kasejena, aç'a' Dxus Nçxi'k Jesukristo eea' kwe'sx pkaltxi jxuka khukhuna.

8 Txã'jíte', kîh pkal yuhwa ji'phmeetha'w jîwá'nja'w na' peekiçxáa ya'îsxiisa yu'nja'w.

9 Nawa txã'wě yajxmée, pkalsayuhth sũhna Dxusa's perdon pēyi'nja'w aç'a' txã'wě yũusa's kim yuhnawa wa'lmée jxuka kxtey peltunãyçxa ewmeesa's jxuka nuyaateena.

10 Txã'jíte' kîh yuhwa ewmée yũusameetha'w jî'nja'w na' Dxus we'weçxa': Ewmeesata' jîçxa' îsxiija'k jîsa yu'nja'w.

2

Dxus tasxte kwe'sx ju'gu we'we pu'çxsa' Kristo'

1 Adx luuçxwe'sx, pkalte fxi'zekahmenthu pta'sxna fxi'ja'. Txã'wětewa maai' yu' pkalte wetewá'kwe nawa Dxus tasxte kwe'sx ju'gu we'we pu'çxsa ji'ptha'w, txã' Jesukristo' isasa yu's jxuka kxtey yuusáa.

2 Jesukristok kwe'sx pkal pa'gate vxite' naa kiwete nasa jxukaysa pkal pa'gate yã'jçxa ya'dukhçxa uu.

3 Dxus jxkaahnitxi's kxtey yuuna fxi'zeçxa yuuçxáa Dxusa's jiiyuhth sũhwa'ja's ya'ji'phuna.

4 Nawa maai' yu' Dxusa's jiith jîwáana nawa txajx jxkaahnitx kxtey nwēese'jsame' txã' îsxiisa yuuna.

5 Maawa Dxus jxkaahnitx kxtey nwēese'jena txã' Dxus peeygãani's ũuste jxuka ji'phsaçxa

txã'wẽ yuuna. Txã'wẽ yuuçxáa Dxus yakh fxi'zena ũsne'tka'w sũhwa'ja's ya'ji'phuna.

⁶ Dxus yakh fxi'zena ũsthu jĩsa', Jesukristo na'wẽy kĩh pkal yuhwa ji'phmée fxi'zena.

Dxus jxkaahni u'sesa

⁷ Adx peeygãanisawe'sx, i'kwe'sxtxi' Dxus jxkaahni u'sesa pta'sxna fxi'jaçmeeth, Dxus jxkaahni nyafxii pta'sxte iiwẽse'jyã'ji'kwe txãáiçxá'.

⁸ Txã'wẽçxawa na'wẽ nyafxii jxkaahni's kaayaki'jna fxi'jaçthu txã' u'sesa na'wẽ yuh kaseje'k. Txajíçxáa i'kwe'sxa' Kristo's ũsuh jxuka peeygãhçxa', i'kwe'sx pwe'sxwa txã'wẽy yũuna fxi'zeçi'kwe. Txãa pa'ga açxha' skhẽuuça' jxpubana çxhi'dxte fxi'zenisa', açã' jxpubamée fxi'zeni eena'sa vxyaça'.

⁹ Maaí' jxpubamée eena'te ũsthu jĩçxawa tx-ajx yakhthẽ'ja's açena, txã' jxpubana çxhi'dxte fxi'zesaçxa txã'wẽ yuuna.

¹⁰ Jxpubamée eena'te fxi'zesa' txajx yakhthẽ'ja's ahçemée peeygãhna fxi'zena, kĩh yuhwa pkalte kweete'jwa'j yu'sa' vxitmée.

¹¹ Nawa txajx yakhthẽ'ja's ahçena fxi'zesa' çxhi'dxte uyya' ãjamée mtee pa'jwa'ja's yuuwa jiiimée jxpubana fxi'zesaçxa txã'wẽ yuuna.

¹² Adx luuçxwe'sx, i'kwe'sx pkala' peltunãynitx yuu Jesukristo uute', txãa pa'gath fxi'ja'.

¹³ Txã'wẽy thẽ'jsawe'sx, i'kwe'sxa' na'wẽ nyafxii entey Jesukristo' ũsyã'kh yu' txã'sna jiyupa'gath fxi'ja'. Sa' piçtakxwe'sx, eçxthẽ'ja's knayi'kwe txãa pa'gath fxi'ja'.

Adx luuçxwe'sx, Dxusa's jiyui'kwe txãa pa'gath fxi'ja'.

¹⁴ Thê'jsawe'sx, na'wê nyafxíi entey Jesukristo' ũsyâ'kh yu' txã'sna jiyupa'gath fxi'ja'. Sa' piçtakxwe'sx, Dxus pta'sxni's ũuste yu'akhçxa eçxthê'ja's ũukhmée knayi'kwe txãa pa'gath fxi'ja'.

¹⁵ ãçxha' kxazsay mpa'yajkxwe, naa kiwetewe'sxa's yajkxya'mée. Maawa naa kiwetewe'sxa's yaakxsa' Dxusa's yaakxsameeçxa txã'wê yuuna.

¹⁶ Txãa pa'gatey naa kiwete' na'wê yaakxnisaçxáa ũsta': naa kakwe' kazx yũuna fxi'zeni, yafxju uyçxa kazx ũus yaakxni, kîhwa ji'phçxa' iiwejçx iiwejçx yajkxna fxi'zenisaçxáa ũsta'. Txã'wê ewmeesa yuuçxá'sku naa kiwe' ũsu', aça' txã'wêsa' Dxus jxthãasnisame'.

¹⁷ Naa kiwete txã'wê yũuwa'jçxáana yajkxna fxi'zesa' jxuka pçuwa'jsata' petx naa kiwe yã'jçxa. Nawa Dxus jxthãasniçxá's kxtey yu-usa', bagaçxte yuhwa pçumée îtxi fxi'zewa'ja's ji'phutxna.

Dxus Espiritu' kaajiyu'ju'k maa ãsxiinisatewa, txã'wêy maa isasatewa

¹⁸ Adx luuçxwe'sx, ãçxha' nmeh en ãjk. I'kwe'sxa' iiwêse'jne'kwe Kristo's açesa pa'jana jîni's. Txãasa ãçxha' wala kuh ũsta' Kristo's açesa. Txãa pa'gatha'w jiyu' nmeh en yuuçtewa.

¹⁹ Txãawe'sxa' kwe'sx yakh ũswa'jsamée ne'ta yu', txãasatx kwe'sx ksxavxyuh kaseh. Kwe'sx yakh ũswa'jsawaça', txuteewa'jmée ne'ta yu'.

Jxukay yu' kwe'sx yakh fxi'zewa'jsameetxna, txãasatx txã'wẽ txutee.

²⁰ Nawa i'kwe'sxa' Dxus Espiritu's ũuste ji'phi'kwe, txãasa maa isasatewa txã'sa' jxpubawa'jsamée i'kwe.

²¹ I'kwe'sxa' isasa's jxpubawa'jsamée i'kwe naa pa'gaiçxáath fxi'ja', peekx jii i'kwe ĩsxiinisa' bagaçxte yuhwa isa kaseje'çme'.

²² ¿Kim txã'wẽ ĩsxiisa yuukx? Jesusa' Dxus kaahnisame' jĩna we'wesa txã'wẽ ĩsxiisa yuuna. Txã'wẽ we'wesa' Dxus Nçxi'knawa jxpa'gamée yã'jçxa', Neynawa jxpa'gasameeçxa txã'wẽ yuuna.

²³ Maawa Dxus Nçxi'ka's açesa', Neynawa açesa yuuna. Nawa Dxus Nçxi'ka's jxpa'gasa', Neynawa jxpa'gasa yuuna.

²⁴ Txajii nyafxii pta'sxni Dxus yuwe isasa's i'kwe'sx ũuste ew mjxaawwe. Txã'wẽ yũuçxa' Dxus Nçxi'k yakh txutemée fxi'zene'kwe, sa' Ney yakhwa txã'wẽy txutesamée yuune'kwe.

²⁵ Aça' txã'wẽ yũusatxi' Jesukristo' peesya' neeyũuk bagaçxte yuhwa pçumée ĩtxi fxi'zewa'ja's.

²⁶ I'kwe'sxtxi maawa kaypuba'jwe'sxteth pta'sxi' jxpa'yakxkahn.

²⁷ Nawa i'kwe'sxa' Dxus Espiritu's ũuste ji'phi'kwe na' maa ĩsxiinisana aça' vxite' maa isasatewa thëymée jiyune'kwe, txãa pa'gatey Dxus Espiritu' kĩhtewa jxukak kaajiyu'ju', sa' txajx kaapiya'jni' ĩsxiinisameeta'. Txã'wẽ jiyuçxa', Kristo yakh txutemée fxi'zene'kwe.

²⁸ Adx luuçxwe'sx, açxha' Kristo yakh txutemée mfxi'zewe. Txã'wẽ fxi'zeçxa',

thaamemée weçxana jxpa'ga'nja'w Kristo' naa kiwete kîhçxa vxyaatewa.

²⁹ I'kwe'sxa' jiiyã'ji'kwe Jesukristo' kîhtewa jxuka ew yūusaatewa, aça' maawa txãa na'wēy kîhtewa jxuka ew yūuna fxi'zeçxa', Dxus luuççxa txã'wē yuuna.

3

Kwe'sxa' Dxus luuçç yã'tha'w

¹ Dxus peeygãani' seena' yuh wala' txã'sna miiyajxwe. Txã'wēçxaíik adx luuççwe'sx jîna kxsusu' kwe'stxxi'. Aça' kwe'sxa' txajx luuçç yuhtha'w. Txãa pa'gatx naa kiwetewe'sxa' kwe'stxxi' jiyu'çmée, Dxusa's jiimeeta' naa pa'ga.

² Adx peeygãanisawe'sx, kwe'sxa' Dxus luuçç yã'tha'w. Nawa Kristo kîhte', ma'wē seena' zhiçxkwe neeyūuwa'jsa ne'tka'w txãa yu'sa' ūus yajxçxa kpajkxya' yu' aja'çmeetha'w. Nawa Jesukristo vxyaate', txãa ma'wēsate' weh yuhwa fxiymée txãa na'wēy neeyūuwa'j yu'sa' jiitha'w.

³ Aça' maawa txãa na'wēy yuu wēesa' pkal ji'phmée fxi'zena, Jesukristowa ma'wē kîh pkal yuhwa ji'phmeesana txã'wēy.

⁴ Maawa pkalte fxi'zesa' Dxus jxkaahnitx nwēese'jmée ūsçxa txã'wē yuuna, aça' Dxus jxkaahnitx kxtey yuumée ūsni' pkal íiçxá'.

⁵ I'kwe'sxa' jii i'kwe Jesukristo' kwe'sx pkaltxi txuhdeya'k naa kiwete kîh, nawa txãa yu' kîh pkal yuhwa ji'phmeesak yu'.

⁶ Txãa pa'ga maawa Jesukristo yakh fxi'zesa' pkalte fxi'zeçme'. Aça' maawa pkalte fxi'zesa'

Jesukristo's iuumeena, sa' txãa ma'wēsatewa jiimeesaçxa txã'wē yuuna.

⁷ Adx luuçxwe'sx, mpa'yajkxwe, i'kwe'sxtxi maawa kaypuba'jwe'sxte. Jesukristo na'wēy ew yūuna fxi'zesa yuuçxáa, ewsa yuuna.

⁸ Nawa pkalte fxi'zesa' eçxthē'j yakh ũssaçxa txã'wē yuuna, txãa pa'gatey eçxthē'ja' nyafxiitey pkalsak yu'. Txajiiçxáak Dxus Nçxi'ka' eçxthē'j mjīini's ivxiituya' kīh naa kiwete.

⁹ Dxus luuçxa' maa yuhwa pkalte fxi'ze'çmeeta', txãa pa'gatey txãawe'sx ũusa's Dxus yu'pthehçxa nvxiitnisata' naa pa'ga. Txãasa pkalte fxi'zewa'jsameeta' Dxus luuçx yã'ja'.

¹⁰ Txãa pa'gak ya'jiyu' maa Dxus luuçxtewa. Sa' maa txã'wē eçxthē'j luuçxtxiwa ya'jiyu'k: Maawa ewmeeçxáa yūuna txajx yakhthē'jwe'sxtxi ahçena fxi'zesa' txãawe'sxa' Dxus luuçx meeta'.

Teeçxa na'wēçxah puutx ya'peeygãhna fxi'zewa'ja'

¹¹ I'kwe'sxa' Kristo kaapiya'jni's iiwēse'jne'kwe txã' na'wēk yu': Teeçxa na'wēçxah puutx ya'peeygãhna fxi'zewa'j yu'.

¹² Eçxthē'j yakh ũssa Kaina' txajx nyakha's ikhku, nawa kwe'sxa' txãa na'wēy yuuwa'jsameetha'w. ¿Kīh yuutega ikh wakx? Kain mjīini' ewmeek yu', aça' nyakh mjīini' ewsak yu' txãa pa'ga yuuçxáak ikh.

¹³ Adx yakhthē'jwe'sx, kuh yaakxnuwe naa kiwetewe'sx ahçetewa.

14 Txãa pa'gatey kwe'sxa' vxituwa'ju kasehçxa bagaçxte yuhwa pçumée ïtxi fxi'zewa'the pa'jsatha'w, txãasa íçxáatha'w yakthē'jwe'sxtxi peeygāja'. Nawa maawa txajx yakthē'ja's peeygāasame', txãa vxituwa'ju kasehsameeçxa txã'wē yuuna.

15 Maawa txãawe'sx yakthē'jwe'sxtxi ahçena fxi'zesa', nasa's ikhsa na'wēysa íçxá'. Aça' i'kwe'sxa' jii i'kwe nasaa ikhsa' kim yuhwa pçumée ïtxi fxi'zewa'ja's ji'phumeetxna.

16 Jesukristo' kwe'sxtxi peeygāhçxa nwe'weya' txajx ïtxi fxi'zeni's ivxiituk. Txãa txã'wē peeygāani yaase'. Aça' kwe'sxwa txã'wēy kwe'sx yakthē'jtx peeygāhçxa kwe'sx ïtxi fxi'zeni's ivxiituwa'j ji'ptha'w.

17 Nawa kwe'sx yakthē'j peejiina ũste uyçxawa kīhçxáawa iijxtxuhdemeçxa', ¿ma'wē Dxus peeygāani's kwe'sx ũste ji'ptha'w jīya' ājakxtha'w?

18 Adx luuçxwe'sx, kwe'sx peeygāani' yuwejuçxáa peeygāa we'wewa'jme'. Isa peeygājaççxa', āate kaavxya'ja'jwa'ja' kīhçxáawa pu'çxna.

Kwe'sx ũste ewçxáa ũusutheçxa', Dxus dxi'pte jxpubamée ũste txã'wē yuuna

19 Txã'wē yūuçxa', isa Dxus luuçxçxa txã'wē yu'nja'w, sa' Dxus dxi'ptewa jxpubamée ũsne'tka'w sūhwa'ja's ji'phu'nja'w.

20 Nawa kīhteçxáawa jxpubaaçte', kwe'sx ũusçxáa yuhwa kaayaki'ji'k aça' Dxusa' kwe'sx ũste jxthaakwe ew jīisa' aça' txajx dxi'pte ïsxiiya' ājame'nja'w.

21 Adx peeygāanisawe'sx, kwe'sx ũuste ewçxáa ũusuthena aç'a' Dxusa' pasuna sũhçxa

22 Dxusa's pēyi'nja'w aç'a' txã' jxuka ũsuna txajx jxkaahnitx nwēese'jçxa Dxus jxthāasni's kxtex yuuna fxi'zesatxi'.

23 Dxusa' na'wē yũuwa'ja'sku jxkaaja': txajx Nçxi'k Jesukristo's ũuste jxpa'gaçxa, teeçxa na'wēçxah puutx ya'peeygāhna'k fxi'zekaah.

24 Dxus jxkaahnitx nwēese'jsa' Dxus yakh fxi'zesa yuuna, aç'a' Dxuswa txāawe'sx yakh fxi'zena. Dxusa' kwe'sxtxi txajx Espiritu's peesku, txāa pa'ga kwe'sxa' jiitha'w Dxusa' kwe'sx yakh ũswa'jsatewa.

4

Dxus Espiritu's ji'phsa vxite' Kristo's açewa'j espiritu's ji'phsa

1 Adx peeygāanisawe'sx mpa'yajkxwe, txã'wē Dxus Espiritu's ji'ptha'w jĩsatxi' txã'wē yuhtxna sũhmée mfxi'zewe. Txã'jĩsatxi' ew jiyuwa'ja' Dxus Espiritu's ũuste ji'phdxih'tewa jiyuya'. Txã'wēme' naa kiwete iiméh wala penaçta' Dxus yuwe pta'sxsatha'w jĩna ĩsxiina u'jusa.

2 Na'jĩsaçxáa Dxus Espiritu's ũuste ji'phsa yuuna: Dxus Nçxi'k Jesukristo' kwe'sx na'wēy nasaa yuuçxak vxyaa jĩsa yuuçxáa isa we'wesa yuuna.

3 Aç'a' Jesusa' kwe'sx na'wēy nasaa yuuçxak vxyaa jĩsame', txã' Dxus Espiritu's ũuste ji'phmeena, wejxwa Kristo's açesa yuuna. I'kwe'sxa' iiwēse'jne'kwe txã'jĩna we'wesa pa'jatxna jĩni's. Txāasa ũsyã'tha' naa kiwete.

4 Adx peeygãanisawe'sx, i'kwe'sxa' Dxus luuçxi'kwe, txãasai'kwe ãsxiisatxi' knay, txãa pa'gatey Dxus Espiritu i'kwe'sx ùuste ùssa' thaakwe çxhãçxhasa' naa kiwete ãsxiisawe'sx ùuste ùssameeçxa'.

5 Txãa ãsxiisa' naa kiwetewe'sxta'. Txã'wẽçxaítx naa kiwetewe'sxçxáana pta'sxi', aça' nasa naa kiwetewe'sxa' nwẽese'je'tx.

6 Nawa kwe'sxa' Dxus luuçxtha'w, aça' maawa Dxusna jiisa' kwe'sx pta'sxni's nwẽese'je'tx. Nawa Dxus luuçxmeesa', kwe'sx pta'sxni's nwẽese'je'çmeeta'. Kxah kwe'sxa' jiyu'nja'w kim Dxus Espiritu's isa ùuste ji'phtewa, txã'wẽy kim kaypuba'jsatewa.

Peeygãanisa' Dxus tasxuh yuja'

7 Adx peeygãanisawe'sx, puutx ya'peeygãhna fxi'zewa'j ji'ptha'w, txãa pa'gatey peeygãhna fxi'zewa'ja's Dxusku pees naa pa'ga. Aça' maawa peeygãhna fxi'zesa' Dxus luuçxta' Dxusa's jiisa.

8 Dxusa' peeygãasa', aça' peeygãawa'ja's ji'phmeesa' Dxusa's jiimeesaçxa txã'wẽ yuuna.

9 Dxusa' kwe'sxtxi peeygãani's ãate kaavxya'ja'kh txajx Nçxi'k teeçxçxáasanawa naa kiwete kaahçxa, txãa nwe'wete' pçumée itxi fxi'zewa'ja's kwe'sx ji'phukahh.

10 Na'wẽ yũunisaçxáa peeygãani' yaase': Kwe'sxa' Dxusa's açasatewa, txãa yu' kwe'sxtxi peeygãhçxak txajx Nçxi'k makwe teeçxçxáasatewa kwe'sx pkalpa'gate uuwa'jsa vxitçxa kaah.

11 Adx peeygãanisawe'sx, Dxusa' txã'wẽ kwe'sxtxi peeygãhte', kwe'sxwa txã'wẽy puutx ya'peeygãhna fxi'zewa'j ji'ptha'w.

12 Kim yuhwa Dxusa's uysa yu' meetxna. Nawa kwe'sxa' puutx ya'peeygãhna fxi'ze'nja'w aç'a' txã'wẽ yũute', Dxusa' kwe'sx ũuste nes yuuna, aç yuuçxáa kwe'sxwa txãa na'wẽy ew peeygãasa yu'nja'w.

13 Kwe'sxa' Dxus yakh nes yuute', txãawa txã'wẽy kwe'sx ũuste nesku yu', txãa pa'gáiçxáak txajx Espiritu's kwe'sx ũuste nvxiht.

14 Kwe'sxa' iuuytha'w Dxusa' txajx Nçxi'ka's kaakh naa kiwete nasatx nwe'wekahn, txãasatha'w kwe'sxa' äate pta'sxi'.

15 Maawa Jesusa' Dxus Nçxi'ka' jĩna we'wesa' txã' Dxus yakh ũssaçxa txã'jĩna, aç'a' Dxuswa txajx ũuste nes yuuna.

16 Äçxha' jiyutha'w Dxusa' kwe'sxtxi txakwe wala peeygãani's. Dxusa' peeygãasa', aç'a' maawa peeygãhna fxi'zesa', Dxus yakh fxi'zesa yuuna, aç'a' Dxuswa txãa yakh nes yuuna.

17 Txajuk kwe'sx peeygãawa'ja's isa jxukate ya'ji'phuna ya'pa'ja'. Txã'wẽ yũunijũ' kastigãywa'j ente' ũukhme'nja'w, txãa pa'gatey naa kiwete kwe'sxa' Jesukristo na'wẽy peeygãasa yu'nja'w naa pa'ga.

18 Dxus txakwe wala peeygãasa's ¿ma'wẽ ũukhwa'j yuukx? txãa pa'gatey txajx peeygãanisa' kwe'sx ũukhni's jxuka ivxiitu'k. Aç'a' ũukhsa' kastigãywa'jne'tka sũhçxa ũukhuna, sa' txã'wẽ yaakksa' kwe'sxtxi Dxus txakwe wala peeygãani's açxa ew jiimeeçxa

txã'wẽ ùukhuna.

¹⁹ Dxus khuẽ'yku kwe'sxtxi peeygãh, txãa pa'gatha'w ãçxa' kwe'sxwa Dxusa's peeygãja'.

²⁰ Maawa Dxusa's peeygãja'th jĩçxawa yakthẽ'ja's ahçena fxi'zesa', ìsxiisa yuuna. Peekx yakthẽ'j uyna fxi'zenisa's ahççxa', ¿ma'wẽ yũuçxa Dxus uynimeesa's peeygãjxa' ãjakx?

²¹ Dxusa' na'wẽk jxkaaja': Dxusa's peeygãjaççxa', txã'wẽy peekx yakthẽ'jnawa peeygãawa'ja' jĩ'k.

5

Dxus luuçxa' ewmeesa's nwẽese'jmée jxuka knayu'tx

¹ Maawa Jesusa' Dxus tasxu yuusa Kristona sũhnaçxáa ùuste yaakksa', Dxus luuççxa txã'wẽ yaakina. Dxusnawa peeygãjaççxa', Dxus luuçxtxiwa peeygãhna fxi'zewa'ja'.

² Dxusa's peeygãhna txajx jxkaahnitxi' nwẽese'jçxa', Dxus luuçxtxiwa peeygãasaçxa txã'wẽ yu'nja'w.

³ Dxusna peeygãani txã'wẽ txajx jxkaahnitx nwẽese'jnisa'. Txajx jxkaahni' jxthaakwe yu' thẽysameeta'.

⁴ Maawa Dxus luuçxa' naa kiwete ewmeesa's nwẽese'jmée jxuka knayu'tx. Jesukristo's ùusuh jxuka yaakxpa'ga yuuçxáak naa kiwete ewmeesa's ya'knayu'.

⁵ Maawa Jesusa' Dxus Nçxi'kna sũhna ùusuh jxuka yaakksa yuuçxáa, naa kiwete ewmeesa's nwẽese'jmée knayuutxna.

Jesukristo' Dxus nçxi'ktewa kaajiyu'jsa' naata'

⁶ Jesukristo naa kiwete kīisa' Dxus Nçxi'ktewa kaajiyu'jsa' naata': Yu'te bautisāyni vxite' kluuste uuni. Nawa yu'te bautisāynijũçxáa yu'açxaméek ew ya'jiyu', naasáa kluuste uuniisa yakh txáa e'z jwedsa yakh yuuçxáak isa ew ya'jiyu' Dxus Nçxi'ktewa. Txá'sa' Dxus Espirituk txá'jĩ'. Txajx we'weni' isasata'.

⁷ Jesukristo' Dxus Nçxi'ktewa jiisa cielute' tekhta': Dxusa', vxite' Jesukristo iĩçxá', vxite' Dxus Espiritu'. Aça' txáa tekhsa' txáa na'wẽçxaçxáatx we'we'.

⁸ Txá'wẽy Jesukristo' Dxus Nçxi'ktewa jiisa naa kiwete' tekhta': Dxus Espiritu, vxite' yu'te bautisāynisa vxite' kluuste uuniisa. Aça' txáa tekhsa' txáa na'wẽçxaçxáatx we'we'.

⁹ Piçthẽ'jwe'sx pta'sxniçxáa yuhnawa isa yuh we'wene' sũhnatha'w jxpa'ga'. Aça' Dxus we'weni yu' wejx jxthaakwe isasa yuhna sũhna jxpa'gawa'j ji'ptha'w, txáa pa'gatey Dxus yuuk we'weçxa': Jesukristo' Adx Nçxi'ka' jĩ' naa pa'ga.

¹⁰ Jesukristo' Dxus Nçxi'ka' sũhna fxi'zesa', Dxus Nçxi'ka's ũuste jxpa'gasaçxa txá'wẽ yaakina. Nawa Dxus we'weçxa': Jesukristo' Adx Nçxi'ka' jĩni's maawa jxpa'gasame', Dxusa' iĩxiija'k jĩsa yuuna, txá'wẽ Dxusa' isane' we'we' sũhmeçxa.

¹¹ Jesukristo' Dxus Nçxi'ka' jĩna we'weçxa', Dxusa' kwe'sxtxi' pçumée iĩtxi fxi'zewa'ja's peesku jĩnisa', txáa yuuçxáa pçumée iĩtxi fxi'zewa'ja's ji'phsa' naa pa'ga.

¹² Txáa pa'ga maawa Dxus Nçxi'ka's ũuste

jxpa'gasa', pçumée ïtxi fxi'zewa'ja's ji'phsa yu-
utxna. Nawa Dxus Nçxi'ka's ùuste jxpa'gasame',
pçumée ïtxi fxi'zewa'ja's ji'phmeesa yuutxna.

Pkal perdon ji'phmeesawa ùsta'

¹³ Dxus Nçxi'ka's ùuste jxpa'gasa', pçumée
ïtxi fxi'zewa'ja's ji'phne'tka'w sühna jiyukahnthu
i'kwe'sxtxi pta'sxna fxi'ja'.

¹⁴ Aça' txã'wē yaakxsatxi' Dxusa' pasu'k txajx
jxthãasniçxá's pxthaa we'wena pějxte' txã'sa'
ew jiitha'w.

¹⁵ Kwe'sx pxthaa we'weni's Dxusa' wēse'jna
üstewa ma'wē ew jiiitka'w txã'wēy kwe'sx
pēyni's jxpa'gawa'ja'swa ew jiitha'w.

¹⁶ Yakthē'j pkalte fxi'zena üstewa txãa
pkala' perdon ji'phte uyçxa', maawa Dxusa's
neewe'wewa'ja' txãa pkalsa pa'gate, aça'
yakthē'j txã'wē fxi'zesa's Dxusa' ïtxi
fxi'zewa'ja's peesuna. Nawa pkal perdon
ji'phmeesa ùsta' txã'wēsate fxi'zena ùste yu',
Dxusa's neewe'wewa'ja's jxkaja'çmeeth.

¹⁷ Kihwa ewmée yūuni' pkalçxaçxáata', nawa
perdon ji'phta'.

¹⁸ Kwe'sxa' jiitha'w maawa Dxus luuçx yã'ja'
peena yu' pkalte fxi'ze'çme'. Txã'wē yūuwe'sxte
Dxus Nçxi'ka' txajx kusetek jxaawu' eçxthē'j
suwkahmén. Txãa pa'gak pkalte fxi'ze'çmée.

¹⁹ Kwe'sxa' Dxus luuçx yuhtha'w, nawa naa
kiwete nasa jxukaysa Dxusna yajxmée fxi'zesa'
eçxthē'j kusetewe'sxta' txã'sa' jiitha'w.

²⁰ Jiitha'w Dxus Nçxi'k naa kiwete kihçxa',
Dxus ïtxisa's jiyuwa'ja's kwe'sxtxi ũsku. Txãa
pa'ga Dxus ïtxisa Nçxi'k Jesukristo yakh fxi'zena

ũstha'w. Txãa Dxus ãtxisa' bagaçxte yuhwa
pçumée ãtxi fxi'zewa'ja's kwe'sxtxi peessa'.

²¹ Adx luuçxwe'sx, mpa'yajkxwe
dxusmeeçxá's yaakxni's.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd